

Martinus Flanegin di PPA:

GOBIERNO TA SIGUI CU COBRAMENTO CRUEL DI BELASTING

ORANJESTAD (AAN): Segun Martinus Flanegin di PPA, Ministro Tico Croes a viaha pa exterior, mientras e ta laga e Top di Belasting cu mensahe pisa pa pueblo: "Paga bo belasting sino ta manda deurwaarder riba boso... y esaki sin piedad".

Despues di a scucha e mensahe cu e Top di Belastingen/ontvanger a duna recientemente cu maneho cu ta worde ehecuto den nomber di Ministro di Finanzas Tico Croes, Partido P.P.A. a sinta analisa esaki debidamente. E informacion tabata parti den dos parti:

1. Nan a logra cobra 36 miyon Florin na belasting atrasa y aki nan y recientemente tambe Ministro Tico Croes "himself" ta gaba cu nan a logra cobra 36 miyon Florin.

2. E mensahe cu falta solamente 5 luna pa pueblo paga belasting di e ananan atrasa y si no cumpli cu deurwaardernan ta para cla pa pone "beslag" links en rechts y hasta e gastonan di beslag etc. lo a subi barbaramente cu 300% den un tiro.

Partido PPA ta lamenta cu nos NO a tende ningun expression di parti di Ministro di finanzas sr. Tico Croes encunto e dolor cu e cobramiento di belasting na un forma cruel lo a causa cerca hopi ciudadano, hopi famia y hopi dono di negoshi.

E dolor humano aki no ta haya atencion cerca Gobernantenan, al contrario ta worde recorda solamente cu si no paga locual falta anto ta bin mas "beslag" cu ta costa mas placa. Esaki ta e mensahe di Ministro Tico Croes, Lider di Partido A.V.P. cu aparentemente cu NO conoce sentimiento humano mes.

Cuanto individuo, cuanto famia a perde nan propiedadnan, cuanto negoshi a worde ranca di e dononan, sin misericordia ??? Comercio ta sintiendo e consecuencia di e maneho aki, como cu e pueblo NO tin placa mas pa realmente gasta den nos comercio. E pregunta ta kico a ocasiona e cobranza cruel aki? Solamente e hecho cu lo tabata tin belasting atrasa?

NO, e berdad cruel ta, cu na momento cu Gabinete Eman a asumi gobernacion na september 1994, Pais Aruba (gobierno) tabata tin 775 miyon Florin na debe. Durante 1994 y 1999 e debe aki a aumenta na e suma di 1.160 biljon Florin cual ta casi 400 miyon Florin mas cu ta 49% mas na debe pa Gobierno (Pais Aruba). Y esaki tampoco no tabata tur. Tabata tin debenan cu tabata scondi y segun Partido PPA por a deduci esaki lo ta corre di un otro 100 miyon Florin minimal.

Na mes momento e maneho catastrofal di Gabinete Eman (AVP OLA) a pone nos pensioenfond pa nos grandinan den problema hopi serio, SVB a anuncia cu nan a cuminsa usa nan reservenan, mientras cu pensioenfond pa ambtenaar

tambe ta den problema serio como cu e debe di gobierno a aumenta pa casi 600 miyon Florin di cual 300 miyon minimal a bin acerca bao di Gabinete Eman.

Tur esaki a crea e situacion cu Gabinete Eman kier aumenta pensioen pa nos grandinan na edad di 60 ana, mientras nan kier introduci un ley nobo pa pensioen di ambtenaar na edad di 60 aña en vez di 55. Fuera di esey 35 aña pa yega maximum en vez di 30 y introduccion di franchise, cu ta nada mas cu ladronica legal.

A consecuencia di e catastrofe cu maneho di AVP/OLA a causa den nos comunidad, pueblo di Aruba tin un prijs caro pa paga, esaki yama un pakete di medida cu lo afecta e CALIDAD DI BIDA DI E ARUBIANO den futuro cu lo baha substancialmente.

Mientras cu esaki ta e realidad amargo, Ministro di Finanzas sr. Tico Croes, Lider nobo di A.V.P. no ta expresa nada humano, ni proteha e ciudadano humilde dentro di su maneho. No ta larga cobra, ta larga pone beslag y ci bo NO por paga, anto ta distruibo como ciudadano di nos Pais, ta largabo cu NADA.

PPA ta ripiti su pregunta: Esaki tabata meta di nos Status Aparte? Destruccion di nos Arubianonan humilde? Destruccion di nos comercio?

Partido PPA tabata e unico partido cu repitidavez a condena e maneho cruel di cobra belasting den pasado sin tene cuenta cu nos pueblo y nos ta sigui condene den futuro.

Ta pueblo so por lanta pa salba pueblo y esey nos tur mester comprende BON. Door di keda ketu y guli manda abao, nos como pueblo ta permiti abuso pa sigui tuma lugar y esaki mester worde para pa kaba.

Segun P.P.A. teniendo cuenta cu e gastunan di bida y e salarionan abao (50%) di pueblo trahador no ta hiba f. 1500,-- cas fin di luna, beslag/inhouding di su manan substancial NO por sigui mas, esaki ta destrui e ciudadano humilde, su famia y e negociante.

Ta intencion firme di P.P.A. pa den futuro limita e procentahe pa cual inhouding por tuma lugar na un porcentahe mucho mas humano cu actualmente ta e caso. Bendemento di e UNICO cas di un ciudadano y su propiedadnan den tal cas lo mester worde prohibi pa ley.

Esaki ta e UNICO forma pa evita cu a consecuencia di mal maneho y chaos di Gobierno, cu pueblo mester sufri e consecuncianan. Mientras tanto PPA ta ripiti: na e ciento di ciudadano cu a yama nos den panico den pasado y awor atrobe pa LANTA PARA PA DE-

FENDE BO MES, BO FAMILIA Y BO FUTURO. NO PERMITI PA ABUSO Y DESTRUCCION DI BO Y BO FAMILIA PA SIGUI TUMA LUGAR.

Notable tambe ta cu ta pa e di dos vez, cu Ministro Tico Croes ta coi su caminda pa bay cu vakantie den exterior y ta larga mensahenan pisa atras pa worde expresa pa TOP di su departamento durante su ausencia. Esaki ta un forma corbarde pa funciona.

PPA ta haci un yamada na nos

Pueblo pa keda pendiente. Nos tur lo mester sali na vanguardia di nos futuro, door di lanta y bisa e gobierno aki cu nos ta rechasa nan credibilidad, nan integridad como gobernante y como tal nos ta suplican pa e ultimovez pa nan entrega nan retiro y bay cas.

Si acaso nan nenga di respecta e voz di pueblo, pueblo mes lo mester forza respect pa cu su opinion. Nos no por sigui acepta abuso mas, te aki a yega.

ALERTA PA BIYETE FALSO DI 100 DOLLAR

ORANJESTAD (AAN): Un hombre a drenta den un di stacionnan di Coastal, e mester a paga cierto summa y a saca 100 Dollar.

E cahera alerto a tuma nota di e biyete cu esaki ta uno falso. Posiblemente e hombre a tuma nota cu aki si el a dal den duro, pues el a core sali bay.

E trahadornan a nota cu e hombre mester a drenta den

un V-auto y dera bay. Si ta bon, mayoria di stacionnan di Coastal ta equipa cu videocamera, seguramente e tira dor di para aki tambe a worde filma.

Autoridad ta tras di su pista. Un voz di alerto ta bay na muy en particular comerciantenan pa tene cuenta ya cu tin tirador di para ta cana rond pa tuma hende cabez abao.

ROL DI FILM BERDE!!

